

## PASS' IEU... (sirventés)

Pass' ? Passa ! Pas de pass' ? Pass' pas !  
Vira-passa de mal famat ?  
Passadrech pel mond vaccinat.  
Passa-passa, guèrra lassa.

Sens s'arrestar passa lo temps,  
Demòra pel mond revoltat  
De mens en mens de libertat  
E qual serà lor passa-temps ?

PassaPaís ? O PassaBòsc ?  
PassaLac ? PassaCarrièra?  
Masqueta e gèst barrièra  
Que cal far dintrar dins lo clòsc !

Vaccinador ven lo metge,  
amb l'armada mediatica  
e seringa coma pica  
per dondar lo maldomètge.

Te prometrà passapòrta  
Lo vertadièr passapertot  
Siquenon iràs a la sot...  
Que lo diable se l'empòrta !

La puta fa una passa,  
Papet trapava lo senhal  
E nautres farem carnaval,  
D'ara endavant, mordassa !

Farem un passacarrièra,  
Carga lo passamontanha !  
Lo freg engrepís la sanha,  
Cridarem nòstra galèra.

L'ivèrn mena la marrana,  
Beu amic un passa-tot-gran  
E tisana de trescalan.  
Manja la passa-crassana !

Farem un ramelet de flors  
Passaròsa, passavelós,  
Passacura e passaflores  
Per festejar nòstras valors.

Salva-te de badar l'ecran  
Del comèrci lo passaplacat  
Siquenon seràs encloscat.  
A la santat, passa riban ! .

Sufís d'una letra de mai :  
Ajusta n a covidat  
Aital seràs lo convidat  
A nòstra taula, aquò rai.

Òc, avèm pas de passavant,  
E siam estats fòrabandits,  
De la societat, los faidits,  
Mas candes coma l'enfant.

Nos an panat lo paradís  
Siam cagòts novèls a la fin  
Per menar l'aiga al molin,  
Òm se farà ben passalís,

E per mantèner lo ligam  
Passacordèla nos farem  
Passaveta abenarem  
Per assolar del drech la fam

Drech uman de viure e d'intrar :  
Anem, demòres pas sul pas !  
Dintra dins aquel ostalàs  
Ont te podràs requinquilhar

Es ser de passavelhada .  
Vèni dançar los quadrilhas  
Manjarem de passarilhas,  
Serà bèla festejada.

Jogarem al passagent,  
E tanben al passagròla,  
Dançarem la carmanhòla,  
Aquò sens pass' e sens argent.

D'isanha avèm tant patits  
Qu'ameritam plan de cantar,  
De nos tocar, nos abraçar,  
Que sens pass' siam estats passits

Escriguèri pel passatemp,  
Aquel sirventés passable,  
Denonciant un temps aissable,  
Viste que siaga temps... passat !

